



Արեւմտեան

Հայոց



Հայաստանի

Համագումար

Թուրքիայի կառավարությունը խառնված է Պոլսո պատրիարքարանի ներքին գործերին

Դեկտեմբեր 4, 2010թ. 17:12



Ինչպես հայտնի է, Պոլսո պատրիարք Մեսրոպ 2-րդ Մուրաֆյանը անկողնային ծանր հիվանդ է:

Ստամբուլահայ համայնքի մի մասը կարծում էր, որ պետք է ընտրվեր համապատրիարք, քանի որ պատրիարք կարող է ընտրվել միայն նախկին պատրիարքի մահվան դեպքում: Իսկ մյուս մասն էլ պնդում էր, որ ոչ թե համապատրիարք, այլ պատրիարք պետք է ընտրել:

Սակայն, թուրքական կառավարությունն անտեսելով հայ համայնքի կարծիքները, հայտարարեց իր որոշումը՝ արք. Արամ Աթեշյանին նշանակելով փոխպատրիարք:

Բնականաբար, ստամբուլահայերի մի մասը դեմ արտահայտվեց թուրքական կառավարության որոշմանը, որով ներկայիս հիվանդ պատրիարք Մեսրոպ Մուրաֆյանի փոխարեն նոր պատրիարք ընտրելու փոխարեն նշանակվեց փոխպատրիարք: Ի դեպ, այս կերպ թուրքական կառավարությունը դեմ գնաց հայկական եկեղեցու կանոնակարգին, քանի որ <փոխպատրիարք> հասկացություն հայոց եկեղեցում գոյություն չունի:

Ստամբուլահայ համայնքը Թուրքիայի կառավարության որոշման դեմ հանդես է եկել՝ «Ցանկանում ենք ընտրել մեր պատրիարքին» նախաձեռնությամբ. արդեն իսկ հավաքել է 5 հազար 359 ստորագրություն:

Հրավիրված ասուլիսում ստամբուլահայերը հայտարարել են, որ հայ համայնքի ներսում ոչ մի պառակտվածություն չկա և իրենք որեւէ խնդիր չունեն փոխպատրիարք նշանակված արք. Արամ Աթեշյանի հետ, պարզապես, Թուրքիայի կառավարությունը պետք է հարգի հայոց եկեղեցու կանոնակարգը:

Եվ ահա, այս լարված պահին Պոլսի հայոց պատրիարքարանը՝ փոխպատրիարք նշանակված արք. Արամ Աթեշյանի գլխավորությամբ, հանդես է գալիս Թուրքիայի կառավարությանը պաշտպանող հայտարարությամբ, ուր ասվում է. «Շրջանառվող այն լուրերը, թե պետությունը փորձում է հայկական համայնքին զրկել իր հոգևոր առաջնորդին ընտրելու իրավունքից, անհիմն են ու չեն համապատասխանում իրականությանը: Ներկայիս պատրիարք Մեսրոպ Մուրաֆյանի մահվանից հետո, նոր առաջնորդը կընտրվի այնպես, ինչպես դա եղել է մինչև հիմա՝ պատրիարքարանի կարգերին ու ավանդույթներին համաձայն: Այս հարցում ոչ մի փոփոխություն քննարկման ենթակա չէ», - ասված է հայտարարության մեջ:

Այստեղ կա անհանգստացնող մեկ այլ հանգամանք ևս. սկզբից նեթ պարզ էր, որ արք. Արամ Աթեշյանը Թուրքիայի վարչապետ Էրդողանի նախընտրելի թեկնածուն է, և իր քայլերում պետք է հանդես գա թուրքական կառավարության պաշտպանության դիրքերից, ինչի սկանալտեսն

ենք վերոնշյալ հայտարարությամբ: Այդ դեպքում ամբողջովին անհասկանալի են դառնում ոմանց կողմից հնչող այն հայտարարություններն ու հրապարակումները, թե Արևմտյան Հայաստանի եկեղեցիները պետք է անցնեն Պոլսո պատրիարքարանի ենթակայության տակ: Սակայն, այսօր Թուրքիայի կառավարությունն ակնհայտորեն խառնված է Պոլսո հայոց պատրիարքարանի ներքին գործերին, ընդհուպ մինչև հայոց եկեղեցու ներքին կանոնակարգը խախտելով որոշումներ է կայացնում, հետևապես նման առաջարկն այլ բան չի նշանակում, քան հայոց եկեղեցիները ամբողջությամբ հանձնել Թուրքիայի կառավարության տնօրինությանը: Այս առնչությամբ մեջբերեմ Արևմտյան Հայաստանի Հայերի Ազգային Խորհրդի Նախագահ Արմենակ Աբրահամյանի կարծիքը.

«Պոլսո պատրիարքարանը գրանցված է Թուրքիայի տարածքում, հետևաբար, ծառայում է այդ պետության ղեկավարությանը: Ուրեմն, ինչպե՞ս կարելի է թույլ տալ, որ Արևմտյան Հայաստանի ժառանգությունն անցնի Պոլսո պատրիարքարանին: Նույն կերպ կարող ենք ասել՝ իսկ ինչու Պոլսին և ոչ, ասենք Ֆրանսիային, Երուսաղեմին: Այս մոտեցման կողմնակիցները, փաստորեն, բացահայտ հայտարարում են, որ Արևմտյան Հայաստան գոյություն չունի ու ցույց են տալիս, որ պատրաստ են զիջել մեր հազարամյա ժառանգությունը: Շատերը կամ չեն հասկանում այդ վտանգը, կամ ձևացնում են, թե չեն հասկանում: Չէ՞ որ սա ևս մի միջոց է Արևմտյան Հայաստանի հարցը փակելու: Մենք մերժում ենք այս վտանգավոր մոտեցումը: Արևմտյան Հայաստանը մեր հայրենիքի սիրտն է: Մենք այն կարծիքին ենք, որ Արևմտյան Հայաստանը կամ պետք է առանձին պատրիարքարան ունենա, կամ կարող է Ազգային Խորհրդի վերահսկողության տակ անցնեն մեր ժառանգությունները, որից հետո Ազգային Խորհուրդը կորոշի՝ ինչպե՞ս տանել վերականգնման, պահպանության աշխատանքները»:

<http://www.armor.am/?p=57968>

Արևմտեան Հայաստանի Հայոց Ազգային Խորհուրդ
Conseil National des Arméniens d'Arménie Occidentale

BP 61

92224 BAGNEUX CEDEX - FRANCE

e-mail : haybachdban@wanadoo.fr